

CAPITOLO II

BELLEZZE NOSTRANE

SICILIA

Sta Sicilia nostra, tanta bedda,
Di lu munnu è la picciridda,
Lu mari ci fa l'annacatedda,
Lu sulì talìa sempri a idda,
Lu ventu nnaculìa la zacaredda,
Pittata di pumaroru, russulidda,
L'Etna la ncalura e la ncappedda,
Di ciuri havi na scocca ogni mascidda.

E li so figghi, tanti giniusi,
Bruni, caddrusi, comu li cirasi,
Smammati, picciriddi e primurusi,
Sparsi nta lu munnu, a nesci e trasi,
Affruntannu negghi, nivi timpistusi,
Zappannu terri, fabbricannu casi,
E cu li manu, chini di caddri rascaddrusi,
Sannu fari, nta stu munnu, i megghiu rasi.

Sta matri Sicilia mia sempri a piniari,
Sempri di luntananza e cu timuri,
Pi sti figghi, chi nun ponnu abbrazzari
Sta matri terra nostra di rosi e ciuri.
Teni strittu e curtu lu falari?
Chu fu stu mastru? Cu lu criau st'erruri?
Sti figghi chi vannu fora, a travagghiari,
Siminanu l'orgogliu e lu sapuri.

Dunni nchiarisci l'acqua di lu mari
E di la terra si senti lu caluri,
Dunni stannu li passari a cantari
E di li frutta si gusta lu sapuri,
Dunni ti senti di lu ventu accarizzari,
Dunni c'è musica, cantu e fulguri,
Fermati passeggeru e un tu scurdari:
Chista è Sicilia nostra, terra d'amuri.

LU PUTENTI SULI

Quantu malanni nta sta vita umana!
Si susi di lu lettu la matina,
Di punenti nivuruni acchiana,
Ammutta tramuntana fina fina.
L'arvuli, cu l'urtaggi di la chiana,
Lu sali, ncatastatu nta salina,
S'oscura l'aria chi nforza lu ventu,
Forma na gran timpesta, fa spaventu!

Ventu cu acqua, li lampi e li trona,
La strada d'acqua e fangu china china,
Sbucca lu ciumi c'allaga la zona,
Rumpi lu ponti, cari la casina,
Prega na matri, la campana sona,
Riduci vita lacera, mischina,
Negghia, fuschia, friddu, nivicati,
Genti affitti, ghiacciu, strapazzati.

Cu po tuttu stu mali risanari?
Lu nuvulu tintu, tantu capricciusu,
Si spera di lu sulì pi sciugari,
Lu so splinduri vastu, calurusu.
Sulì, sulu tu poi cunzulari,
Nchiariri stu gran celu nuvulusu,
La luci toa, chiara e splendenti,
Sana li chini, puru li turmenti.

Tu, negghia di livanti e di punenti,
Chi passi di la destra a la sinistra,
Sai mpannari l'occhi di la genti,
Tu, pi criari l'umbra si maistra.
Suli, nterra tuttu è risulenti,
Godi la citati e la campagna,
La luci di lu sulì è sincera,
Senza d'iddu nun regna primavera.

PAISI MEU

Paisi meu chi stai supra un timpuni,
Fattu a pirìu comu li campani,
Riccu d'ogghiu, frumentu e di cuttuni,
Chinu di bazzarioti e d'artigiani,
Cu quattru mura, a centru na cappella,
Comu vosi Don Placidu Fardella.

Appenna spunta l'alba matutina,
Lu Sagristanu sona la campana,
Annuncia ch'è spuntata la matina,
N'autru iornu sfilu a la simana,
Comu a un purtuni chi apri la mizzina
Supra la soglia di la vita umana,
Comu l'aneddu nfilatu a la catina,
Chi porta la picuridda a la cullana.

Quattru vicchiareddi primurusi
Vannu a svigghiari a Patri Priuri,
Cu na sciarpa misa ntesta e cun ciuri.
Di lu paisi li chiù riligiusi;
Vannu a priari lu Signuri
Chi sta iurnata sia senza duluri.

Un piratozzu si senti ribbummari,
Lu taccu ntona comu un battituri,
Un viddanu primurusu va a zappari
L'ortu di miluna, puamuri

E tanti autri cosi di mangiari.
Accussì l'assau dittu lu Signuri,
È cuntrattu e s'avi a rispittari.
Lu travagghiu dà la sustanza e lu sapuri.

Lu muraturi all'iscia ca cazzola,
Lu firraru lu passamanu di la scala,
Lu fallignami fa li porti e ci cunzola,
Lu scarparu la scarpa e la stivala,
Lu picciriddu crisci nta la scola,
Canta l'aceddu, l'ariddu e la cicala,
Tuttu è musica cu na simplici parola,
Puru lu scusciu du tratturi, picu e pala.

Bannìa lu vinnituri, lu pisciaru,
S'affaccia la gente p'accattari,
La notti passau mmezzu lu mari,
Mmezzu li ondi comu un lupunaru,
Struttu di dulura e suprafattu,
Ma sempri presenti a l'anticu pattu,
Comu na firma davanti lu Nutaru,
Pi un tozzu di pani duru e amaru.

Alinquannu un nastriteddu culuratu,
Supra na porta o un balcuni, dda mpinnutu,
Un novu nuccinteddu è arrivatu,
Porta a stu munnu lu so contributu.
Na fonti, du torci, un tucchìu,
Na machina, na parrina, na mammana,
È un vattiu. Quanti ricordi teni sta campana,
Missi e festi di zitati,
Di genti fistusi e ralligrati;
E quantu tristizzi, amari e scunzulati.

Na tucchiata, un Crucifissu, n'amicu abbattutu,
Na machina, dui ghirlandi cu na bara,
Partiu, pi sempri si nn'à ghiutu,
Lu cuntrattu sou avìa scarutu.
Un infartu o na machina su para,
O pi vicchiaia o cu la morti du Signuri,
Oppuru qualchi cocciu di lupara
Sparatu di l'omu, tintu, piccaturi;
Ma nenti si cangia, nenti vali,
Stu cuntrattu è ppi tutti tali e quali.

Fra nun moltu mi scari puru a mia,
Pi scuntari li peni davanti a Diu.
Lu populu s'affliggi, ci dispiaci
Sulu nta ddu mumentu, poi finìu.

NATURA E LAVORO

Spunta l'alba e la matina
Ci rispecchia la natura.
Li muntagni e li vaddati,
Comu l'oru da russura.

Mentri la terra gira gira,
Parli e l'ecu t'arrispunni,
L'acqua chiara di lu mari,
Lu vinticeddu fa li unni.

L'acidduzzu ciuciulìa,
Lenta canta la cicala,
Ragghia lu sceccu culussali,
Chi ruspigghia l'autri armali.

Lu addu la matina
Canta, acciancu a la gaddina,
Dici a chiddi chi hannu sonnu:
È spuntatu nautru iornu.

Lu viddanu, cu la zappa,
Và simìna pi la pappa.
Lu cavaddu ci inìa,
Nta la terra stravulìa.

Nesci l'apa sularina,
Appena scialba l'acquazzina,
Posa l'ali spillungati
Supra li ciuri spampinati,
Senza tazza, né fascedda,
Porta meli a la casedda.

La farfalla, di culuri,
Pizzulia e fà l'amuri,
Cu l'ali comu na bannerera
Veni a diri è primavera.

La furmicula, armaledda,
Ammalasea cu bravura,
Lu cocciu mmucca, è stintatedda,
Ni rispecchia la natura.

Lu munnu tuttu è na famigghia
E ogni essiri travagghia;
La natura e lu lavoru,
Tutti e dui, su frati e soru.

PREGHIERA A SAN FRANCESCU D'ASSISI

Pregu a San Franciscu cu amuri,
È un Santu di chiddi li cchiù cari,
L'aceddi ci facianu riuturi,
Attornu leti ci stavanu a cantari.
Franciscu, chi stai vicinu a lu Signuri,
Chi stessi stimmati, sprufunnati e amari,
Scanzaci di lu mali e lu duluri,
Comu scanzavi li virmicceddi a lu passari.

A SAN GIUSEPPE

A San Giuseppi, la Madonna e u Bambineddu
Un missaggiu ci purtau l'Angiuliddu:
Lu Re Erodi pi mezzu du cuteddu
Avìa mmazzari ogni picciriddu.
San Giuseppi pigghiau u sciccareddu,
La Madonna lu so nicareddu,
L'avvulgio nta lu falareddu,
Erodi circava propriu a iddu.

Dopu caminatu tanti uri,
Una guardia li ferma p'indagari.
Chi purtati nmezzu a stu falari?
Risposi la Madonna rosi e ciuri.
La Guardia vitti veru rosi e ciuri,
Picchi l'umanità s'avìa a salvarì,
La Madonna, San Giuseppi e lu Signuri
Lu so miraculu stesi a triunfari.

San Giuseppi, Santu di buntà,
Assiemi a la Madonna e lu Signuri,
Salva di novu chista umanità,
Scanzaci di lu mali e lu duluri,
Semu cunvucati ccà cu tia,
Pi prigari pi la paci e cosi sia.

San Giuseppi, semu davanti a vui,
Cu na festa chi nun si nna vistu mai,
Spirannu l'annu chi beni fari di chiui,
E d'esserci chiù paci e menu guai.
Amici tutti, ringraziu puru a cui
Misi sordi picca e cu assai,
Cu teni fidi a Diu un pirisci mai,
Esisti sulu Cristu e nuddu chiui.